

Xojon carta-la San Pablo xi kiskiù ítjòn-la xita naxandá-la Cristo xi títsajna Tesalónica

Kó tsò Pablo nga síhixat'aà jñà xita naxandá-la Cristo xi títsajna Tesalónica

¹ Jñò xi xita naxandá-la Nainá maà xi titsajnaà ya naxandá Tesalónica nga ya titsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo titsanìhixot'aà-nòjen kò Silvano [tjé-ne xi 'mì Silas] kò Timoteo. Nainá kàtatsjá-nò kjondaà kò kjoa'nchán ya jjiìn inima-nò.

Kó tsò Pablo nga tsjá-la kjondaà Nainá

² K'e nga nokjoàt'aà-lajen Nainá, kjit'aà nachrjein 'biì-lajen kjondaà it'aà tsajòn. ³ Bítseèn-najen nga nguixkòn Nainá xi Na'èn-ná koni s'ín nga titsanìxá, koií kjoa-la nga mokjeiìn-nò it'aà ts'e Cristo, tikoà ndaà nìxá-là xita xi kjejí nga matsjacha, nga tikoà kixi titsajnaà nga titsachiñà-là Jesucristo xi otíxoma-ná. ⁴ Ndí 'ndsè, Nainá matsjakeè-nò. 'Ya-nájen nga xó k'oas'ín jaàjiìn-nò nga xita naxandá-la komaà. ⁵ Nga jè 'én ndaà-la Nainá xi kjoa ts'e Cristo xi tsibènojmi-nòjen, mìtsà ta 'én tsajen xi kinokjoáko-nòjen. Jè Inima Tsjeè-la Nainá kitsjaà-najen nga'ñó, kò tikoà 'ñó ndaà kjòchija-najen nga nguì kixi kjoa. Jñò, ndaà ki'yaà k'e nga ya tsakítsajna-jen, ndaà kinìchjít'aà-nòjen xi kjondaà tsajòn.

⁶ Jñò, k'oaá s'ín ki'nè koni s'ín ki'nè-jen kò koni s'ín s'ín Cristo. Jè Inima Tsjeè-la Nainá kitsjaà-nò kjotsja nga komà kichjoétjò 'én-la Nainá nas'ín 'ñó tse kjo'in tsatojioòn. ⁷ K'oaá ma-ne jñò tsakoò jngoò-la kjoa xi ndaà tjín nga kiskinguì ngats'ii xita xi jye kòkjeiín-la 'én-la Nainá ya nangui Macedonia kò Acaya. ⁸ Nga yaá kjòts'ia-ne it'aà tsajòn nga tsabìsòn jè 'én ndaà-la Na'èn-ná; mìtsà tà ya nangui Macedonia kò Acaya; xki xi ján kina'ya-la nga jñò, ndaà mokjeiín-nò it'aà ts'e Nainá. K'oaá ma-ne nga mì tì kii mochjeén-ne nga ngajen kénajmí-lajen xita it'aà tsajòn, nga jyeé beè-nò xita. ⁹ Nga tijñà bénojmi-ne nga ndaà kichjoétjò-najen k'e nga ijchochoòn-nòjen. Tikoáá tsò-né nga jñò jyeé kinikíjna kjoa ts'e xkòsòn. I'ndeji jyeé ya tjaat'aà-la xi nguì jè sobà Nainá xi kixi kjoa nga tíjnakon. ¹⁰ Tikoáá bénojmi-né nga titsachiña-la Ki'ndí-la Nainá nga kitjojen ijngoò k'a-ne ngajmì, jè xi tijè-ne Jesús xi Nainá kisikjaáya-la k'e nga k'en, nga jè-né xi kochrjekàjiin-ná kjo'in ts'e kjoajti-la Nainá xi sa nchrobá.

2

Xá xi kis'iin Pablo ya naxandá Tesalónica

¹ Jñò ndí 'ndsè kò ndí tichjaá, 'ya-nò k'e nga ijchochón-nòjen mìtsà ta kjotjò. ² Nga jyeé ndaà tíjìn-nò koni s'ín komàt'in-jen ján naxandá Filipos, nga 'ñó tse kjo'in kinikjeiín-jen; 'ñó kijtseètoòn-najen xita; tanga Nainá kisichját'aà-najen nga kitsjaà-najen nga'ñó nga komà tsanguì-jen ya naxandá-nò nga komà tsibènojmi-nòjen 'én ndaà-la Nainá nas'ín 'ñó kjìn

ma kondra-najen. ³ Nga 'én kixí kinokjoàya-jen, mìtsà jò tjin inima-najen nga tsibènojmi-nòjen, tikoá mìtsà xita kichonachan-lajen. ⁴ Nga Nainá jyeé kiskoòt'aà-najen ko k'oaá kitsò nga ok'in-najen nga ngajen kjòngatsja-jen 'én ndaà-la Nainá xi kjoá ts'e Cristo mé-ne nga koma kinokjoaya-jen. Mitsà jè xi mejèn-najen nga ndaà kitsajna-jen nguixkon xita; jè-né nga ndaà kitsajna-jen nguixkon Nainá nga jè xi tibeè inima-ná. ⁵ Jyeé ndaà tjiin-nò nga mìtsà 'én tsjén nokjoà-jen koni tsà mé xi mejèn-najen nga k'oi-najen, tikoáá mìtsà ton binchaàtsji'ma-jen. Kjoá koi, Nainá tibeè-né. ⁶ Mitsà jè binchaàtsji-jen nga jñò, ko xita xi k'ejí, nga 'nga siikitsajna-najen. Tsà jin xi mejèn-najen nga tsibènè-nòjen kjotíxoma xi tjin-najen nga it'aà ts'e Cristo kisixáya-najen, komaá-la okiniko-nòjen. ⁷ Tanga mìtsà kos'in kiniko-nòjen. Ta saá k'oas'in kiniko-nòjen koni ndí ixti. K'oaá ngaya-la koni jngoò nea xi síkaki ixti-la nga ndaà síchá ixti-la. ⁸ 'Nó tjòcha ki'ya-nòjen. K'oaá ma-ne nga ko kjotsja-najen tsibènojmi-nòjen 'én ndaà-la Nainá xi kjoá ts'e Cristo. Tikoáá matsjaá-najen nga ndaà kiniko-nòjen nita mé kjoá xi komàt'ioòn ta koií kjoá-la nga 'nó matsjacha-nòjen. ⁹ Ndí 'ndsè ko ndí tichjaá, bítsjeèn-nò kós'in kinixá-jen nga binchaàtsji'a-jen yijo-najen. Ko nachrjein ko nitjen nixá-jen, mé-ne nga mì jñò sjiti-nòjen jña nachrjein k'e nga kinokjoàyajin-nòjen 'én ndaà-la Nainá.

¹⁰ Jñò, ndaà ki'yaà, tikoáá Nainá kijtseè-né, nga ngajen ndaà kiniko-nòjen. K'oaá s'in kiniko-nòjen

koni s'ín sasén-la Nainá koni s'ín tjín xi kjoa kixi. Ko niyá xi jé kòònè-najen koni s'ín kinìko-nòjen jñò xi mokjeiín-nò 'én ndaà-la Nainá. ¹¹ Tìkoaá jyeé ndaà tjiin-nò nga jen, ndaà kinìko-nòjen nga jngoò ijngoò koni s'ín síko ixti-la jngoò xita xi na'èn ma. ¹² Kinìje ikon-nòjen koa kinì'ñójiiin-jen takòn ko k'oas'ín tsibìnè-nòjen nga k'oas'ín s'een koni s'ín ok'in-la xi xita-la Nainá maà; nga jè-né xi síkí'nchré-nò nga ya titsajnajiiin-là xita xi jye jè tíhotíxoma-la ko tìkoa ya titsajnajñò kjoajeya-la.

¹³ Kjit'aà nachrjein 'biil-lajen kjondaà Nainá koni s'ín ndaà kichjoétjò 'én-la nga mìtsà k'oas'ín kichjoétjò koni 'én-la xi taxki xita. K'oaá s'ín kichjoétjò koni tjín xi nguì kjoa kixi nga 'én-la Nainá-né. Jñà 'én koi, tí'yaá-la nga nchisíxájiin inima-nò jñò xi mokjeiín-nò. ¹⁴ Jñò ndí 'ndsè ko ndí tichjaá, k'oaá s'ín komàt'ioòn koni s'ín komàt'in jñà xita naxandá-la Nainá xi mokjeiín-la it'aà ts'e Cristo Jesús xi títsajna ján nangui Judea. Tijnà-ne xita naxandá judío xíkjin kiitjingui kondra-la. Jñò tijnà-ne xita naxandá tsajòn kiitjingui kondra-nò. ¹⁵ Jñà xita judío kisik'en Na'èn-ná Jesús ko tijnà-ne xita jchínga-la kisik'en jñà xita xi kiichjaya ngajo-la Nainá kjòtseé. I'nde, tákó k'oaá síko-najen nga fitjingui kondra-najen. Nainá mìkì sasén-la kjoa xi s'ín xita koi, nguì kondraá fi-la ngats'ii kjoa, ¹⁶ nga mìkì tsjá'nde nga nokjoà-lajen jñà xi mìtsà xita judío mé-ne nga tìkoa kitjokàjiin-ne kjo'in. K'oaá ma-ne xita koi, skanda nchisíkatonè-la nga ótsji jé-la yijo-la. Jyeé kjomeè f'iikanè-la kjo'in xi tjiko kjojti-la Nainá.

Kó kitsò Pablo nga mejèn-la kjikon jñà xita-la

Cristo xi títajna ya naxandá Tesalónica

¹⁷ Ndseeé kò tichjaá, k'e nga chinchat'aaxìn chiba naxrjein-nòjen, nas'ín mì tì kii kiyaxkon-ná xinguiáá, ngajen 'ño nìkítsjeèn-nòjen. 'Ñó mejèn-najen nga onguíchoòn-nòjen. ¹⁸ Mejèn tsanguì-jen. 'An xi 'mì-na Pablo, kjin k'a mejèn kiaá, tanga jè xitá neíi mìkii kitsjaà'nde-najen. ¹⁹ Kjoa tsajòn-nò nga títachiñá-lajen nga 'ño kotsja-najen kò nga ndaà kitjo-jen k'e nga kjoii ìjngoò k'a Na'èn-ná Jesucristo. ²⁰ Kixii kjoa it'aà tsajòn-nò nga ndaà kitjongui-jen kò nga s'e-najen kjoa tsja.

3

Mé-ne ya kinikasén-ne Timoteo ján naxandá Tesalónica

¹ K'e nga mì tì kii komà kichìkjoa ìsa-najen nga mejèn-najen sijiin-najen kó s'ín títajnaà ján Tesalónica, k'oaá komà-ne nga kichibàya-najen nga kinikasén-jen jè 'ndsè Timoteo, kò ngajen yaá tsitsajna-jen Atenas. ² Kinikasén-jen jè 'ndseeé Timoteo, chi'nda-la Nainá-né nga tìkoáá chjaya 'én ndaà-la Nainá xi kjoa ts'e Cristo koni ngajen. Koií xá kiikon-nò mé-ne nga kàtatsjá-isa-nò nga'ño nga ìsa 'ño ndaà kixi kitsajnaà koni s'ín mokjeiín-nò, ³ mé-ne nga nijngoò xi sihindaà-ne kjoa ts'e kjo'in xi títanìkjoón. Jñò, jyeé ndaà tíjiin-nò nga k'oaá s'ín tjinè-la nga kos'ín komat'iaán. ⁴ K'e nga tisa ya títajnako-nòjen, k'oaá ki'mi-nòjen nga kjo'iin s'e-ná. I'ndeí, jyeé títajaà nga k'oaá s'ín tímat'ioòn. ⁵ Koií kjoa-la nga mì tì kii kiskoòñà kjoa-na; kisikasén Timoteo nga mejèn-na

skoeè kós'ín titsajnakoo jè 'én xi mokjeiín-nò. Tìmakájno-na tsà jye kiskoònachan-nò jè xítà neií. Tsà koií nachrjein-la, xá xi ki'nè-jen, tsà ta kichijà-né.

⁶ I'ndeí, jè Timoteo jyeé j'iì-ne nga kiì Tesalónica; ndaà tsò okixi xi 'ya-najen it'aà tsajòn koni s'ín mokjeiín-nò kò nga tjín-nò kjòtsjacha. K'oaá s'ín tsibénojmi-najen nga kjit'aà nachrjein tsjaá ma-nò nga nikítsjeèn-nájen. Tìkoaá mejèn-nò nga jchaxkoòn-nájen koni ngajen tìkoaá mejèn-najen jchaxkoòn-nòjen. ⁷ K'oaá ma-ne ndí 'ndsè kò ndí tichjaá, nas'ín kjo'in kò kjoa kondra titsajnajin-jen, k'e nga kina'yà-jen it'aà tsajòn nga 'ño ndaà mokjeiín-nò it'aà ts'e Cristo, tìkoaá ngajen, 'ño ndaà kjòtsja-najen. ⁸ K'e nga kina'yà-jen nga kixi onguít'aà-là Na'èn-ná, ngajen jyeé mì tì mé makájno-najen. ⁹ Ngajen, 'ño tse kjòtsja tjín-najen nga nguixkon Nainá xi kjoa tsajòn skanda mì-la kiì kjoehet'aà nachrjein nga k'oi-lajen kjondaà Nainá. ¹⁰ Kò nachrjein kò nitjen nokjoàt'aà-lajen Nainá mé-ne nga tsjá'nde-ne nga koma konguíchoòn-nòjen. Tìkoa koma kokòya-ìsa-nòjen mé-ne nga kojngod-ne 'én xi chijat'aà-nò koni s'ín mokjeiín-nò.

Kjoa bítsi'ba-la Pablo

¹¹ Mejèn-najen nga tijè-ne Na'èn-ná xi Nainá kò jè Jesucristo xi otíxoma-ná, kàtatsjá'nde-najen nga koma konguíchoòn-nòjen. ¹² Jè kjòtsjacha-la Na'èn-ná isa ndaà kàtasijin inima-nò, mé-ne nga isa ndaà kòtsjacha-nò xinguiqo kò ngats'iì xítà xi kj'eíí, koni ngajen, ndaà matsjacha-nòjen. ¹³ Jè Na'èn-ná kàtatsjá-la nga'ño inima-nò mé-ne

nga n̄imé jé sakòt'aà-nò kò tsjeè k̄itsajnaà nga nguixkon Nainá xi Nà'èn-ná k'e nga kjoíí ìjngòò k'a-ne Jesucristo xi otíxoma-ná nga tjìkò ngats'ìi xi ya chja-ne.

4

Kjoa xi sasén-la Nainá

¹ Ndí 'ndse kò ndí tichjaá, k'oaá s'ín tsakoòya-nòjèn nga k'oas'ín s̄ijchá yijo-nò koni s'ín sasén-la Nainá. Kò kixií kjoa, jyeé kòs'ín t̄itsa'nè. Tanga ì'ndeì b̄ítsi'ba-nòjèn t̄ikoà b̄inè-nòjèn ìt'aà ts'e Jesús xi otíxoma-ná nga ìsà 'ñó ndaà t̄jiì-là nga'ño yijo-nò nga kòs'ín t̄ikitasòn.

² Jyeé t̄ijiìn-nò kó s'ín t̄jín kjotíxoma xi kits'ìi-nòjèn koni s'ín kitsjaà-najèn Jesucristo xi otíxoma-ná. ³ Jè xi mejèn-la Nainá nga nguì tsjeè s̄ijchá yijo-nò, mì t̄i kjoa chijngui s̄is'in-là. ⁴ Nga jngòò ìjngòò-nò t̄ikindaa yijo-nò; k'oas'ín t̄ikjeén nga nguì tsjeè t̄itsajna koni s'ín sasén-la Nainá. ⁵ Kì biì'nde-là nga síkijne-nò j̄nà kjoa ch'o xi s̄íjé yijo-nò koni s'ín j̄nà x̄it̄a xi mìkìì beèxkon Nainá. ⁶ J̄nò xi 'ndsee chibá ìt'aà ts'e Cristo, k̄i k'oaá t̄jín kjoa xi kaàj̄nòò mé-ne nga mì xinguiòò chónachan-là nga mì xinguiòò j̄chatoòn. Tsà k'oas'ín s'een, kjo'íín tsjá-nò Nainá. Jyeé k'oas'ín tsibènojmi-nòjèn. ⁷ Nainá mìtsà koi xá kiichja-ná nga ch'o s'een, jè xi mejèn-la nga tsjeè k̄itsajnaá. ⁸ Jè xi ochrjekàngui kjoa koi, mìtsà kjoh̄itsjeèn ts'e x̄it̄a ochrjekàngui, kjoh̄itsjeèn ts'e Nainá ochrjekàngui; nga jè xi tsjá-nò Inima Tsjeè-la.

⁹ Mìkìì mochjeén nga xojòn skiit'aà-ìsa-nò xi ts'e kjoatjòcha. Nainá jye tsakóya-nò kós'ín s̄itjòchaa

xinguiṓo nga jngoṓ ìjngoṓ. ¹⁰ Jyee kṓs'ín títsa'nè nga matsjacha ngats'ì xítà xinguiṓo xi títsajna kóhokji yá nangui Macedonia. Tanga k'oaá s'ín bìtsi'ba-nòjen nga isa ndaà tìtsjacha xinguiṓo. ¹¹ Tìnè-là yijo-nò nga 'nchán títsajna, kì kjoa-la xinguiṓo chingàjñòṓ, t'een xá-nò koni tjin xá xi ma-nò, koni s'ín jye ki'mì-nòjen ngats'ì kjoa koi. ¹² Mé-ne nga skoexkón-nò jñà xítà xi mìkì mokjeiín-la 'én-la Nainá. Koa jñò, ñimé chijat'aà-nò.

K'e nga kjoí ìjngoṓ k'a-ne Na'èn-ná Jesucristo

¹³ Ndí 'ndsè ko ndí tichjaá, mejèn-najen nga kátasijiín-nò mé kjoa xi mat'in jngoṓ xítà xi biyaá, mé-ne nga mì kobaá-nò koni jñà xítà xi ñimé nchikóña-la. ¹⁴ Koni s'ín mokjeiín-ná nga Jesús k'en, ìkjoàn jaáya-la, k'oa tís'ín mokjeiín-ná nga Nainá sùkjaáya-la xítà xi jye k'en, jñà xi mokjeiín-la it'aà ts'e Jesús.

¹⁵ Nga koií 'én bènojmiya-jen koni tsò 'én xi tsibíjna Jesús nga jñá xi títsajnakoaán skanda k'e nga kjoí ìjngoṓ k'a Na'èn-ná Jesucristo, mìtsà jñá kjíín ítjòn-lá jñà xi jye k'en. ¹⁶ Nga jè sobà Na'èn-ná kítjojen ìjngoṓ k'a-ne ngajmì; 'ñó kichja nga tsjá okixi, kíná'ya jngoṓ-la jta ts'e àkjalé ítjòn, ko kíná'ya-la chrjo-la Nainá; ìkjoàn jñà xítà xi jye k'en nga mokjeiín-la it'aà ts'e Cristo, kjoaáya ítjòn-la. ¹⁷ Ìkjoàn jñá xi tákó títsajnakoaán jè nachrjein jè, yaá tjámijìn-tjen-koaá jjiín ifi nga kixokjoaá Nainá ya jjiín isén. K'oaá s'ín koma nga ya kítsajnakoaá Nainá ñita mé nachrjein-ne. ¹⁸ K'oaá ma-ne nga tije takòn xinguiṓo nga tènøjmiya-là koni tsò jñà 'én koi.

5

1 Ndí 'ndsè kò ndí tichjaá, mìkìl mòchjeén nga xojon sít'aà-nò mé nàchrjein-ne nga okoma. 2 Jñò, nga jyeé ndaà tíjìl-nò, jè nàchrjein k'e nga kjoí lɔngò k'a Na'èn-ná Jesucristo, k'oaá s'ín kjoí koni jngò xita chijé xi f'ii nga nitjen k'e nga nɔyá xi nchikoñaá-là. 3 K'e nga kɔtsò jña xita: “Nchán titsajnaá, nímé kjoa tjin.” K'ée tà nitòon kitjojenè-là kjojkón koni s'ín mat'in jngò chjoón xi bijchó nàchrjein-là nga ki'ndí 'beé, mìkìl kojno-là. 4 Tanga jñò ndí 'ndsè kò ndí tichjaá, mìtsà ijìl jñò titsajnaà jñò. Kò k'oaá ma-ne nga mì k'oaá s'ín komat'ioòn jè nàchrjein jè, koni ma k'e nga ta nitòon fi jngò xita chijé. 5 Tanga jñò, ngats'ioò, iseèn choòn ñánda titsajnaá, kò nàchrjein-né. Nga jña, mìtsà ijìl jñò titsajnaá kò mìtsà nitjen titsajnaá. 6 K'oaá ma-ne nga mìkìl k'oa s'éeen koni s'ín xita xi kj'eíi nga mì titsajnandaà-jèn mé kjoa xi tjin k'oaá ngaya-là koni tsà kjiyjòfè. Mochjeén-né nga kitsajnandaá koni jngò xita xi tíjnakon, xi nguì ndaà tjin ikon. 7 Nga jña xita xi oyijòfè, k'ée oyijòfè k'e nga jñò. Kò jña xi mach'i, k'ée mach'i k'e nga jñò. 8 Tanga jña, yaá titsajnaá ñánda iseèn choòn. K'oaá ma-ne nga ndaà sijchá yijo-ná. Jè 'én xi mokjeín-ná kò jè kjoatjòcha, jña kosiko inima-ná koni jngò soldado xi ndaà kɔtsa inima-là jè chrjoa xi 'mì coraza. Kò k'e nga nguì tíjngò takoán nga chiñá-lá jè nàchrjein k'e nga kitjokàjñaá kjo'in, jè ngaya-là tsí'nguién kɔcha xi osìkò skò soldado. 9 Nainá mìtsà koi xá jaàjìl-ná nga kjo'in tsjá-ná, jé-né nga kitjokàjñaá kjo'in it'aà ts'e Jesucristo xi otíxoma-ná. 10 Nga jè k'en ngajo-ná

mé-ne k'e nga kjoíi ìjngoò k'a-ne, tsà tìtsajnakoaán, kò tsà jye k'én, yaá kìtsajnakoaá. ¹¹ K'oaá ma-ne nga tìjetakòn kò tjiì-la nga'ño xinguiòo koni s'ín jye tìtsa'nè.

Kjotíxoma xi kitsjaà Pablo

¹² Ndí 'ndsè kò ndí tichjaá, nìjé-nòjen kjondaà, jchaxkón xitá xi síxáko-nò nga jña tìtsajna ítjòn ya jjiìn naxandá-la Nainá kò nga okóya-nò. ¹³ Ndaà jchaxkón tìkoo ndaà tìtsjacha xitá koi, jè kjoa-la xá xi s'ín. 'Nchán tìtsajnakoo xinguiòo.

¹⁴ K'oa tìs'ín bìtsi'ba-nòjen ndí 'ndsè kò ndí tichjaá, kot'in-là nga kàtasíxá jña xitá xi ta jyò tjíma nga majìn-la síxá; tì'ño ikon jña xi indaà tjin ikon; tìchját'aà-là jña xi tsjìn-la nga'ño ya jjiìn inìma-la; kò kàtas'e-nò kjoatsejta it'aà ts'e ngats'ii xitá-la Nainá.

¹⁵ Tsà k'e nga mé kjoa xi ch'o síko-nò xitá xi kj'eíí, tìkindaa xinguiòo nga mì sjiìndà ngajo-ne. Ta saá tìnè-là yijo-nò nga kjit'aà nachrjein ndaà tìkoo xinguiòo kò ngats'ii xitá xi kj'eíí.

¹⁶ Kjit'aà nachrjein tsja t'è-là inìma-nò. ¹⁷ Tìtsi'ba kjit'aà-là Nainá. ¹⁸ Nìtá mé kjoa-ne, tjiì kjit'aà-là kjondaà Nainá. K'oaá s'ín mejèn-la Nainá nga k'oas'ín s'een ngats'ioò xi mokjeíín-nò it'aà ts'e Cristo Jesús.

¹⁹ Kì bichjoá ikòn-là xá xi s'ín Inìma Tsjeè-la Nainá. ²⁰ Kì nachrjekànguiòò 'én-la xitá xi chja ngajo-la Nainá. ²¹ Ndaà ndaà chít'aà yije ngats'ii 'én. Jña tìkìtsajnatjò xi ndaà tsò. ²² Ngats'ii xi ch'o tsò, kì kii nìkitasòn.

²³ Jè Nainá xi tsjá kjoa'nchán, jngoò k'a tsjeè kàtasíkìtsajna-nò. Ndaà kàtasíkìnda inìma-nò,

yijò-nò kò kjòhítsjeèn-nò mé-ne nga ñimé jé s'e-nò jè nàchrjein k'e nga kjoíí ìjngòè k'a jè Jesucristo xi otíxoma-ná. ²⁴ Nga xítà kixi-né jè Nainá xi xó kiichja-nò, sùikitasòn yijéé kjoà koi.

Kó kitsò Pablo nga síhixat'aà xítà

²⁵ 'Ndseé kò tichjaá, titsi'batjì-nájen.

²⁶ Tiixot'aà ngats'ì xítà 'ndseé nga nguì kò inima-nò.

²⁷ 'An, tsja-nò okixi nga nguixkòn Na'èn-ná nga kàtaxkejiìn-la xojòn jè ngats'ì xítà naxandá-la Nainá.

²⁸ Jè kàtijnakò-nò kjondaà-la Jesucristo xi otíxoma-ná.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9f778253-d34e-5037-af35-7bca16479aa0